

დამტკიცებულია
სსიპ შოთა რუსთაველის საქართველოს ეროვნული სამეცნიერო
ფონდის გენერალური დირექტორის
2019 წლის 04 ივნისის N 66 ბრძანებით

ახალგაზრდა მეცნიერთათვის სტიპენდიის მოსაპოვებლად კონკურსის წესი

მუხლი 1. ზოგადი დებულებანი

1. წინამდებარე წესი აწესრიგებს კონკურსში მონაწილე სუბიექტების მიერ მეცნიერების პოპულარიზაციისათვის მიზნობრივი კონკურსის (შემდგომში - კონკურსი) ფარგლებში სტიპენდიის გაცემის, კონკურსის გამართვისა და საკონკურსო განაცხადის (შემდგომში – საკონკურსო განაცხადი) განხორციელების მონიტორინგის წესს.
2. კონკურსის მიზანია მეცნიერების პოპულარიზაციისათვის ახალგაზრდა მეცნიერთა წახალისება, რომლებიც ეწევიან სამეცნიერო-კვლევით საქმიანობას საქართველოს სამეცნიერო-კვლევით ან ავტორიზებულ უმაღლეს საგანმანათლებლო დაწესებულებაში.
3. კონკურსი ფინანსდება საქართველოს სახელმწიფო ბიუჯეტიდან და მის ადმინისტრირებას ახორციელებს საჯარო სამართლის იურიდიული პირი - შოთა რუსთაველის საქართველოს ეროვნული სამეცნიერო ფონდი (შემდგომში – ფონდი). კონკურსის დაფინანსებისათვის შესაძლებელია, არსებობის შემთხვევაში, გამოყენებული იქნას დაფინანსების სხვა წყარო.

მუხლი 2 ტერმინთა განმარტება

ამ წესში გამოყენებულ ტერმინებს აქვს შემდეგი მნიშვნელობა:

- ა) **ფონდი** – საჯარო სამართლის იურიდიული პირი – შოთა რუსთაველის საქართველოს ეროვნული სამეცნიერო ფონდი;
- ბ) **გენერალური დირექტორი** – ფონდის გენერალური დირექტორი, რომლის ფუნქციებში შედის დასაფინანსებლად შერჩეული საკონკურსო განაცხადების დამტკიცება და, საჭიროების შემთხვევაში, საკონკურსო განაცხადებში ცვლილების შეტანის შესახებ გადაწყვეტილების მიღება;
- გ) **საკონკურსო განაცხადი** - დაფინანსების მოპოვების მიზნით, ამ წესით განსაზღვრული პირობების მიხედვით ფონდში წარდგენილი საკონკურსო განაცხადი;
- დ) **ახალგაზრდა მეცნიერი** დოქტორის, ან მასთან გათანაბრებული აკადემიური ხარისხის მქონე პირი, ახალგაზრდა მკვლევარი, საქართველოს მოქალაქე, რომლის აკადემიური ხარისხის მინიჭების წლიდან კონკურსის გამოცხადების წლამდე, გასულია არაუმეტეს 7 წელი და ეწევა სამეცნიერო-კვლევით საქმიანობას საქართველოს სამეცნიერო-კვლევით ან ავტორიზებულ უმაღლეს საგანმანათლებლო დაწესებულებაში.

ე) **შეფასების კრიტერიუმები** – ფონდში წარდგენილი საკონკურსო განაცხადების შესაფასებლად საკონკურსო კომისიისთვის განსაზღვრული, ამ წესით დამტკიცებული სახელმძღვანელო პრინციპები სათანადო ქულების მითითებით;

ვ) **დამოუკიდებელი ექსპერტი** – პირი, რომელიც საჭიროების შემთხვევაში აფასებს კონკურსის ფარგლებში წარდგენილ საკონკურსო განაცხადებს;

ზ) **საკონკურსო კომისია** – კონკურსზე დარეგისტრირებული საკონკურსო განაცხადების შემფასებელი ორგანო, რომელიც განიხილავს და აფასებს კონკურსში შემოსულ საკონკურსო განაცხადებს, საკონკურსო განაცხადების შეფასების კრიტერიუმების შესაბამისად;

თ) **სტიპენდია** – ახალგაზრდა მეცნიერის მიერ კონკურსის შედეგად მოპოვებული ყოველთვიური ანაზღაურება.

ი) **საანგარიშო პერიოდი** – ხელშეკრულებით განსაზღვრული დროის მონაკვეთი, რომლის განმავლობაშიც ახალგაზრდა მეცნიერი ახორციელებს სასტიპენდიო ხარჯვას და დასრულების შემდგომ წარუდგენს ფონდს პროგრამულ ანგარიშს;

კ) **სასტიპენდიო ანგარიში** – ანგარიში მოიცავს სასტიპენდიო განაცხადის დასრულების შემდგომ, ახალგაზრდა მეცნიერის (სტიპენდიანტი) მხრიდან ფონდში წარმოდგენილ პროგრამულ ანგარიშს;

ლ) **სასტიპენდიო ხელშეკრულების შესრულების მონიტორინგი** – ხელშეკრულებით შესრულების დამადასტურებელი ანგარიშის შემოწმება.

მ) **მიზნობრივი ანგარიში** – საგრანტო ხელშეკრულებაში განსაზღვრული ახალგაზრდა მეცნიერის მიერ პროექტისათვის გახსნილი საბანკო ანგარიში, რომელზეც არ დაირიცხება სარგებელი და მოხდება ყოველთვიურად სტიპენდიის ჩარიცხვა;

ნ) **ტრანში** – სტიპენდიით განსაზღვრული ყოველთვიურად გადასარიცხი/გადარიცხული სახსრები;

მუხლი 3. სასტიპენდიო კონკურსის ადმინისტრირება

1. სტიპენდიის მოპოვება შესაძლებელია მხოლოდ კონკურსის წესით. კონკურსს აცხადებს და ადმინისტრირებას უწევს ფონდი ამ წესითა და ფონდის გენერალური დირექტორის ინდივიდუალური ადმინისტრაციულ-სამართლებრივი აქტით გათვალისწინებული პროცედურების მიხედვით.

2. ფონდი უზრუნველყოფს:

ა) საკონკურსო დოკუმენტაციის მიღების ვადების დადგენას; კონკურსის პროგრამისა და პირობების, საკონკურსო განაცხადის ფორმების, სასტიპენდიო დოკუმენტაციისა და სასტიპენდიო ანგარიშების შესრულების ფორმების შემუშავებასა და დამტკიცებას;

ბ) კონკურსის გამოცხადებას;

გ) კონკურსში რეგისტრირებული საკონკურსო განაცხადების ტექნიკურ ექსპერტიზას, რაც გულისხმობს წარმოდგენილი საკონკურსო განაცხადების დოკუმენტაციის შესაბამისობის დადგენას კონკურსის პირობებთან;

დ) საკონკურსო განაცხადების შეფასებისათვის აუცილებელი პროცედურების უზრუნველყოფას;

ე) კომისიის მიერ საკონკურსო განაცხადების განხილვას შეფასების კრიტერიუმების შესაბამისად, მიღებულ შეფასებებზე დაყრდნობით რანჟირებული სიების დადგენას, გამარჯვებული საკონკურსო განაცხადების გამოვლენასა და დამტკიცებას.

- ვ) ახალგაზრდა მეცნიერთან ხელშეკრულების გაფორმებას და დაფინანსებას;
- ზ) ხელშეკრულებით გათვალისწინებული პირობების შესრულების მონიტორინგს.

მუხლი 5. კონკურსის პირობები

1. კონკურსში მონაწილეობის მიღების უფლება აქვს საქართველოს მოქალაქე ახალგაზრდა მეცნიერს.
2. კონკურსის ფარგლებში წარმოდგენილი საკონკურსო განაცხადი ითვალისწინებს სახელობითი სტიპენდიების კატეგორიებს შემდეგ სამეცნიერო მიმართულებებში:
 - ა) ნიკო კეცხოველის სახელობის სტიპენდია საბუნებისმეტყველო მეცნიერებების მიმართულებით;
 - ბ) ალექსანდრე ქართველიშვილის სახელობის სტიპენდია ინჟინერია და ტექნოლოგიების მეცნიერებების მიმართულებით;
 - გ) ივანე ბერიტაშვილის სახელობის სტიპენდია სამედიცინო და ჯანმრთელობის მეცნიერებების მიმართულებით;
 - დ) დავით სარაჯიშვილის სახელობის სტიპენდია აგრარული მეცნიერებების მიმართულებით;
 - ე) დიმიტრი უზნაძის სახელობის სტიპენდია სოციალური მეცნიერებების მიმართულებით;
 - ვ) ივანე ჯავახიშვილის სახელობის სტიპენდია ჰუმანიტარული მეცნიერებების მიმართულებით;
 - ზ) ექვთიმე თაყაიშვილის სახელობის სტიპენდია საქართველოს შესწავლელი მეცნიერებების მიმართულებით;
3. კონკურსში გამარჯვებულად გამოვლენილი ახალგაზრდა მეცნიერი მიიღებს ყოველთვიურ სტიპენდიას 1250 ლარის ოდენობით ერთი წლის განმავლობაში და იღებს ვალდებულებას 1 წლის განმავლობაში ჩაატაროს 4 სამეცნიერო პოპულარული ლექცია (2 თბილისის და 2 საქართველოს რეგიონებში) ზოგადსაგანმანათლებლო საჯარო სკოლების პედაგოგებისთვის.
4. კონკურსში გამარჯვებული ახალგაზრდა მეცნიერი ასევე ვალდებულია სტიპენდიის დასრულებისას, სამეცნიერო -კვლევითი მიღწევების შესახებ საპოსტერო მოხსენებით წარდგეს ფონდის მიერ ორგანიზებულ კონფერენციაზე.
5. დადგენილი ვადის და ფორმის დარღვევით წარმოდგენილი საკონკურსო განაცხადები საკონკურსოდ არ განიხილება.
6. საგრანტო ხელშეკრულებით გათვალისწინებულ სტიპენდიას, ყოველთვიური ტრანშების სახით ფონდი რიცხავს ავანსად ახალგაზრდა მეცნიერის მიზნობრივ ანგარიშზე.

მუხლი 7 კონკურსში მონაწილეობისათვის წარსადგენი დოკუმენტაცია:

- ა) განცხადება „ახალგაზრდა მეცნიერთათვის სტიპენდიის მოსაპოვებლად კონკურსში მონაწილეობის შესახებ (დანართი 2 - გენერირდება გრანტების მართვის ერთიანი სისტემის-GMUS-იდან) წარმოდგენილი უნდა იყოს ფონდის კანცელარიაში, დადასტურებული განმცხადებლის ხელმოწერით;
- ბ) განმცხადებლის პროფესიული ბიოგრაფის (CVქართულ და ინგლისურ ენებზე) (დანართი 3) ივსება GMUS-ში „მეცნიერის პროფილის“ რეგისტრაციის დროს.
- გ) განმცხადებლის სამოტივაციო წერილი დარგში ბოლო 5 წლის პერიოდში სამეცნიერო მიღწევების მითითებით (დანართი 4) იტვირთება GMUS ში PDF ფაილის სახით;
- დ) ახალგაზრდა მეცნიერის დოქტორის აკადემიური ხარისხის დამადასტურებელი დოკუმენტი; PDF ფაილის სახით.
- ე) ცნობა სამუშაო ადგილიდან PDF ფაილის სახით.

მუხლი 8. კონკურსზე რეგისტრაციის წესი

1. კონკურსით მოთხოვნილი საკონკურსო დოკუმენტაცია იტვირთება GMUS -ში **2019 წლის 04 სექტემბრის 16:00 სთ-მდე.**
2. „განცხადება კონკურსში მონაწილეობის შესახებ“ ამობეჭდილი და ხელმოწერილი წარმოდგენილი უნდა იქნას ფონდის კანცელარიაში **2019 წლის - 06 სექტემბრის 16:00 სთ-მდე.**
3. ფონდი უფლებამოსილია, კონკურსის ნებისმიერ ეტაპზე კონკურსიდან მოხსნას საკონკურსო განაცხადები, რომლებიც არ შეესაბამება კონკურსის მიზნებისათვის დადგენილ მოთხოვნებს ან შეიცავს ყალბ ინფორმაციას.
4. ფონდი არ ანაზღაურებს საკონკურსო განაცხადების მომზადებისა და წარდგენისათვის გაწეულ ხარჯებს.

მუხლი 9. საკონკურსო განაცხადების შეფასება

1. კონკურსზე დარეგისტრირებულ განაცხადებს აფასებს ფონდის გენერალური დირექტორის ინდივიდუალური ადმინისტრაციული სამართლებრივი აქტით შექმნილი საკონკურსო კომისია.
2. საკონკურსო კომისიის მუშაობის წესი განისაზღვრება გენერალური დირექტორის ადმინისტრაციული სამართლებრივი აქტით.
3. საკონკურსო კომისია საკონკურსო განაცხადებს აფასებს ამ წესით დადგენილი კრიტერიუმებზე დაყრდნობით. საკონკურსო განაცხადის დაფინანსების აუცილებელი პირობაა 20 მაქსიმალური ქულიდან 15 ან მეტი ქულის მიღება.
4. გენერალური დირექტორი ამტკიცებს საკონკურსო კომისიის მიერ გამოვლენილ გამარჯვებულ საკონკურსო განაცხადებს.

მუხლი 10. ინტერესთა კონფლიქტი

1. დაუშვებელია საკონკურსო კომისიის წევრი იყოს ამავე კონკურსის მონაწილე.
2. არ შეიძლება საკონკურსო განაცხადების შეფასების და დამტკიცების პროცესში მონაწილეობდეს საკონკურსო კომისიის წევრი:
 - ა) რომელსაც აქვს საერთო პუბლიკაცია საკონკურსო განაცხადის წარმდგენთან, ან მონაწილეობდა მასთან ერთსა და იმავე სამეცნიერო-კვლევით პროექტში, ან მუშაობს ერთსა და იმავე სტრუქტურულ ერთეულში (ფაკულტეტი, დეპარტამენტი);

ბ) რომელმაც შესაძლოა მიიღოს უშუალო პროფესიული, ფინანსური ან პირადი სარგებელი საკონკურსო განაცხადის გამარჯვების ან დამარცხების შემთხვევაში;

3. ამ დებულების მიზნებისათვის ნათესავად ჩაითვლება:

ა) პირდაპირი ხაზის ნათესავი;

ბ) მეუღლე, მეუღლის და-ძმა და პირდაპირი ხაზის ნათესავი;

გ) აღმავალი ხაზის პირდაპირი ნათესავის და-ძმა;

დ) და-ძმა, მათი მეუღლეები და შვილები.

4. საკონკურსო კომისიის წევრი ვალდებულია გენერალურ დირექტორს ოფიციალურად აცნობოს ამ მუხლში აღნიშნული გარემოებებისა და თვითაცილების შესახებ.

5. იმ შემთხვევაში, თუ ინფორმაცია საკონკურსო წევრის ინტერესთა კონფლიქტის შესახებ ფონდისთვის ცნობილი გახდა დასაფინანსებლად შერჩეული საკონკურსო განაცხადების ფონდის მიერ დამტკიცებამდე, ფონდი უფლებამოსილია იმსჯელოს შესაბამისი საკონკურსო კომისიის წევრის მიერ გაკეთებული შეფასების გაუქმებასთან დაკავშირებით.

მუხლი 11. ხელშეკრულება

გამარჯვებულების დამტკიცების შემდეგ, ფონდი უზრუნველყოფს ახალგაზრდა მეცნიერთან ხელშეკრულების გაფორმებას, რომელშიც დეტალურად გაიწერება ურთიერთვალდებულებათა პირობები.

მუხლი 12. შესრულების მონიტორინგი

1. დაფინანსებული ახალგაზრდა მეცნიერი ვალდებულია საანგარიშო პერიოდის ბოლოს ფონდის გენერალური დირექტორის მიერ დამტკიცებული ფორმების შესაბამისად, ფონდს წარუდგინოს პროგრამული აქტივობების ანგარიში.

2. ფონდი ახორციელებს დაფინანსებული საკონკურსო განაცხადების სასტიპენდიო ხელშეკრულების შესრულების მონიტორინგს, რომლის დროსაც განიხილავს სტიპენდიანტის მიერ წარმოდგენილ ანგარიშს და ადგენს შესაბამის განხილვის აქტს.

3. მონიტორინგი მოიცავს პროგრამულ მონიტორინგს.

პროგრამული მონიტორინგი გულისხმობს სასტიპენდიო ხელშეკრულებით გათვალისწინებული ვალდებულებების შესრულების დამადასტურებელი ანგარიშის შემოწმებას. ფონდი უფლებამოსილია პროგრამული მონიტორინგის ფარგლებში განახორციელოს ადგილზე ვიზიტები, სასტიპენდიო ხელშეკრულებით განსაზღვრული პროცედურების მიხედვით.

4. სტიპენდიანტის მიერ წარმოდგენილი ანგარიშების შემოწმების საფუძველზე მომზადებული განხილვის აქტები ფონდის მიერ შესაძლოა გამოყენებულ იქნეს სტიპენდიანტის მიერ მომავალ სასტიპენდიო კონკურსებში მონაწილეობისას წარდგენილი საკონკურსო განაცხადების შეფასებისას.

მუხლი 13 პროექტის შეჩერება, შეწყვეტა და დასრულება

ფონდი, საქართველოს კანონმდებლობის შესაბამისად, შეწყვეტს სტიპენდიის გაცემას (შესაბამისად, შეწყდება პროექტი), თუ:

ახალგაზრდა მეცნიერმა ხელშეკრულებით ნაკისრი ვალდებულებები ან/და ანგარიშში წარადგინა ყალბი ინფორმაცია.

მუხლი 14. დამატებითი მოთხოვნები ახალგაზრდა მეცნიერთა მიმართ

1. კონკურსში გამარჯვების შემთხვევაში, ახალგაზრდა მეცნიერმა უნდა წარმოადგინოს Power point-ში მომზადებული საჯარო ლექციების მეცადინეობების ვიზუალიზაცია, რომელიც განთავსდება ფონდის ვებგვერდზე და გავრცელდება სოციალური მედიის საშუალებით.
2. საჯარო ლექციების ფარგლებში შექმნილი ვიზუალურ პროდუქცია (ფოტო, აუდიო, ვიდეო მასალები, პრეზენტაციები, ბუკლეტები, ფლაერები და ან სხვა ტიპის მასალები) განთავსდება ფონდის ვებგვერდზე და გავრცელდება სოციალური მედიის საშუალებით.youtube -ით.

მუხლი 15. საკონკურსო განაცხადების შეფასების კრიტერიუმები

კონკურსის შეფასებისას გამოიყენება შემდეგი კრიტერიუმები:

N	კრიტერიუმი	1 სუსტი	2 საშუალო	3 კარგი	4 ძალიან კარგი	5 ბრწყინვალე	საბოლოო შეფასება/ქულა / კომენტარი
1.	განმცხადებლის პუბლიკაციები (საერთაშორისო რეფერირებად ჟურნალებში) ბოლო 5 წლის განმავლობაში						5
2	სამეცნიერო კონფერენციებში, ფორუმებში და სამეცნიერო-კვლევით საგრანტო პროექტებში მონაწილეობა						5
3	საერთაშორისო და ადგილობრივი პატენტი და სხვა ინტელექტუალური საკუთრების უფლება						5
4	საერთაშორისო /ეროვნული ნომინაციები, ჯილდოები, პრიზები, სტიპენდიები						5
ჯამი:							

საკონკურსო განაცხადის დაფინანსების აუცილებელი პირობაა 20 მაქსიმალური ქულიდან 15 ან მეტი ქულის მიღება.

თანაბარი ქულების შემთხვევაში უპირატესობა მიენიჭება იმ საკონკურსო განაცხადებს, რომლებიც მეტ ქულას დააგროვებენ პირველ კრიტერიუმში.